


Chhuah fan: Oct., 1984

SEPTEMBER, 2017

# RAMTHAR



## KAMALACHERRA KOHHRAN BIAK IN



Ambassa Bial, Tripura chhúnga awm a ni a. Kohhran member 250 vêl awmin, Rangkhoh (Hrangkhawl) hnam an ni a, Molsom (Mualthum) tlém an awm bawk. Biak In hi anmahni kutkawiha an sak a ni. Biak Inah chuan Rangkhoh jawng hmang chungin, Mizo Bible leh Hla Bu an hmang thung

### **SERMON**

HE HMUNAH HIAN AN DING NGHET...*phêk 3 - 5*

RAMTHAR ASSOCIATION CHANCHIN BU THLA KIP CHHUAH  
EDITORIAL BOARD 2016 - 2018

Editor	: Rev. Thangzauva	9612950043 (M)
Joint Editors	: Dr. Robert S. Halliday	9862374232 (M)
	Upa Zoramthanga	9436362385 (M)
	Pi C. Lalrampárl	9436190803 (M)
News Editor	: T Upa Lalbiakênga Fanai	9436366234 (M)
Cir. Manager	: Pu Lailawmnakima Hmar	8575178109 (M)
Publisher	: Rev. K. Lalrinmawia	9485140409 (M)

[Office hun chhúngin biak ni thei se]

**Member-te**

Rev. Lalzulthanga	: Synod Moderator
Rev. Lianhmingthanga Sailo	: Synod Secretary (Sr.)
Rev. B. Sangthanga	: Executive Secy., I/c Mission
Rev. Lalremruata Ralte	: BEC Member
Upa H. Thangmawizuala	: BEC Member

Thu chhuah tûr nei chuan Email - ramtharchanchinbu@gmail.com-ah emaw  
lehlam chauhvah ziaikin Editor emaw Cir. Manager, Ramthar Chanchin bu,  
Synod Office, Aizawl, Mizoram (India) hnénah emaw thawn tûr a ní e.

Ramthar Chanchinbua thu chhuah hí a ziaaktu mawhphurhna a ní.

**SYNOD MISSION BOARD HOTUTE:**

<b>Rev. B. Sangthanga</b>	<b>Executive Secretary</b>	9436372139
<b>Rev. K. Lalrinmawia</b>	<b>Secretary</b>	9485140409
<b>Dr. Robert S. Halliday</b>	<b>Coordinator</b>	9862374232

**KUM KHAT LÂK MAN - ₹ 60/-**  
**A CHHÛNGA THU AWMTÉ**

- |                                    |         |
|------------------------------------|---------|
| 1. Editor thukhawchâng             | - 1     |
| 2. Keimahni                        | - 2     |
| 3. Sermon                          | - 3-5   |
| 4. BUHHMUN ATANGIN:                | - 6-18  |
| (1) Lalpa an ring mék              |         |
| (2) "Lalpa, nangmah chauh..."      |         |
| (3) Udalguri Jail-a rawngbâwlna    |         |
| 5. Mission rawngbâwlna pawimawhzia | - 19-22 |
| 6. Pathian min kohna zawn zêlah... | - 23-24 |
| 7. Ramthar Feh                     | - 25-32 |

## EDITORIAL

**KRISTA LEH KOHHRAN**

'Krista' tih chu hriak thih, Pathian mi ruat, hna bik thawk tura serh hran tihna a ni a. 'Isua Krista' tih leh 'Krista Isua' tih hi Bible-ah sawi a ni ve ve a. 'Isua Krista' tih aiin 'Krista Isua' tih hi thihna hneha a thawhle hnu-ah hman tam deuh zawk a ni. A thu awmzia erawh a dang chuang lo.

Isua Krista leh a Kohhran hi a inzawm tlat a. Chu chu Saulan Lal Isua hnung zuitute tiduhdah tura Damaska kawnga a kal laia êngin a chhun tluk tuma Krista Isua thu sawiah khan a Chianghle: "*Isua, i tiduhdah hi ka ni e,*" (Tirh 9:5). Kristiante tiduhdahtu chuan Isua Krista a tiduhdah a ni.

Kohhran chu Krista Mo, van atanga a rawn zawn, nakinah vana a la hruai chhoh tur a ni a. Krista taksa a ni bawk. Lu chu Krista a ni a. Lu leh taksa chu a inzawm a; sawi hran theih ni mah se, lak hran theih a ni lo. Chutiang tak chuan Krista leh a Kohhran hi a inzawm a ni. Kohhran chu Pathian chhungte, khawvela a chenna chhungkaw awmchhun, a hmanrua (*agent*) a ni. Rangkachak khawnvar dahna pasarih zinga vei veia kha a Kohhranah hian a cheng reng a; chhan a hunah a chhan a, hum a tul hunah a hum a, tanpui leh tihchak a tul hunah a tul ang zelin a thawhsak thin.

Miin Kohhran a do chuan Krista a do a ni; a hneh ngai lo vang. Miin Kohhran a chhuahtsan chuan Pathian chhungkua a chhuahtsan a ni; a hlim ngai lo vang. Kohhran chu Pathian Biak In Thianghlim (*Temple*) a ni. Thlarau lam chaw, Krista hnen atanga dawnna hmun a ni. Chutah chuan thlarau lam chaw tha tinreng a awm a ni.

Krista chuan a Kohhran tan a nun a hlan a, a thisenin a lei. Chutiang bawkin Kohhran chuan a nun a hlana, a rawngbawlsak chu a din chhan, a nun chhan, a chakna leh a hlimna a ni. Kohhran chu mitthi khaw kulh kawngkhar pawhin a ngam loh, Diabola leh a tirhkohte hnehtu a nih avangin, Krista hnung zuitu - a hneha awm, a kohte, a thlante leh a tana rinawmte pawhin an hneh thin. Chutianga a hnung zuitu, a Kohhranhote chuan Krista leh a Chanchin Tha puan darh chu an nunpui a, an chakna leh lawmna tikimtu a ni.

*Krista leh Kohhran,  
Kan dam chhan ber ni se.*

**K E I M A H N I****† TUARPUINA:**

**1) Upa Hranga (77)**, Field Veng, Vairengte, Pu Davis Lalpachhunga, Headmaster, Diblibagh (Home Mission South) pa chuan ni 21 April, 2017 khán Mitliam avàngin chatuan ram min pansan.

**2) Pu Khawtinthanga (70)**, Zemabawk Field Veng, Nl. Vanlalchhanhimi, Evangelist Teacher, Lakla (Arunachal 'E') pa chuan ni 12 July, 2017 khán Lung natna avàngin chatuan ram min pansan bawk.

Synod Mission Board-in lusún chhúngte a tuarpui tak zet a ni. Pathianin thlamuanin, awmpui mawlh rawh se.

**† FIELD COMMITTEE:** Ni 3-18 August, 2017 chhúngin Rev. B. Sangthanga te, Rev. Lalchhuanmawia te leh Upa Denghmingthanga te chuan Odisha Mission Field leh Calcutta Mission Field te tlawhin Mission Field Committee an neihpui a.

Dr. Robert S. Halliday te, Rev. Lalchhuanmawia te leh Upa Denghmingthanga ten Siliguri Mission Field leh Nepal Mission Field te tlawhin, Field Committee an neihpui bawk.

Ni 14-23 August, 2017 chhúng hian Rev. K. Lalrinmawia te, Rev. Lalremruata Ralte te leh Upa F. Lalfakzuala ten Jharkhand Mission Field-ah te, Patna Mission Field-ah te leh Delhi Mission Field-ah te Field Committee-in an kal bawk.

**† CONFERENCE LEH SUMMIT:** NCCI-in Ranchi-a ni 23-24 August, 2017 chhúnga Mission hruaitu 45 telna tura Mission Conference a buatsaihah IMA (Indian Missions Association) aiawhin Rev. K. Lalrinmawia, Secretary, Synod Mission Board a kal.

IMA-in Hyderabad-a 'India Youth Summit' ni 16-18 August, 2017 chhúnga a buatsaihah SMB aiawhin Rev. Billy Lalrinchhana i/c Hyderabad Kohhran chu a tel bawk.



**SERMON**  
**AN DING NGHET HE HMUNAH HIAN**  
**(KHB. No. 398: 2)**

Chhiar tûr: 2 Tim 2:3; 2 Kor 13:5

*Rev. K. Rolungmuana*  
*Director, Synod Revival*

Mihringte hian kan chènna khawvêl hi sawi fiah tum ta ila, kan sawi dân a inang lo nualin a rinawm. A chhan chu, kan hmuh dân leh hriat dân inan loh vàng a ni. Ringtu nun leh awm dân tûr chungchângah pawh kan thu inanna lai tam tak a awm rualin, inan lohna lai pawh eng emaw zât chu a awm tho mai thei e. Hetiang khawvêlah hian rinnaah kan awm em? Mahni i inen fo thin ang u.

Rinnaa entawn tlâk Bible-a kan hmuhte hi entawn tlâk an nihna chhan chu mi tam takin kan tawh ve loh thil an tawhna aţanga lo piang chhuak a ni hlawm. Chutiangin, rawngbâwltu entawn tlâk tak takte pawh an lo ni zêl mai nia.

Pathian ringtu, mi ropui tak tak Bible-a kan hmuhte nun hi keini, tûnlai mite tán hian chakna thar min petu tûr chanchin a ni. Mi thenkhat - Nova te, Abrahamama te, Joba te, Paula te leh Timothea te

chanchin ngawt han en pawh hian Pathian an rinnaa an rinawmna hi kan tán thuchah hlu tak a ni.

Nova te, Abrahamama te hun lai khán thangthar an awm ve ang a, hmasâwnna thar pawh a awm ve ngeiin a rinawm a. Chûng boruaka inhnim pil mékte chuan engtin ngai ve tak maw? An rualpui leh an aia upa hlir ni ta se, puitling takin an thlirin an hre thiam ang; mahse, chutiang chu a ni bîkin a rinawm loh. Mahse, chutiang hun harsaah chuan an rinnaah

an ding nghet tlat a, an tih tûr leh tih loh tûr an hre chiang êm êm niin a lang.

Keini pawh kan then-rualten min hriatthiampui lo mah se, Pathian kan rinnaah ding nghet ve ila; chu chu kan tán a that bâkah mi dangte Pathian lama hruaitu leh tichaktuah a ñang thei a ni.

Job-a chanchin hi kan hre lâr khawp mai. A chugah tuarna nasa tak a lo thleng a. A thil neih, ro hlu tak tak dangte bâkah a fate an thi zo va, amah ngeiin natna khirh tak a tuar bawk. A nupuiin a hre thiam thei lo niin a lang; chu mai ni lovin, a ñhian ñhate pawhin an hre thiam lo.

Mahse, a rinnaah chuan a ding nghet tlat. *“Lalpan a pe a, Lalpan a la leh ta a ni. Lalpa hming chu fakin awm rawh se!”* titu chuan, *“Pathian hnên ata thil ñha kan hmu a, thil ñha lo pawh kan hmu lo ang em ni?”* a ti mai a ni.

Paula leh Timothea te chanchin hi kan hriat lâr a

ni bawk àwm e. Harsatna an tawh chhan leh hrehawm an tuar chhan chu Lal Isua an rin vâng a ni. An hun laia mipui vântlângin an hriatthiampui loh leh ram hruaitute leh mi thiltithei tam takin an pawmpui loh avângin an lêt chuang lo. An rinnaah an nghet tlat mai a, tuarna chu Krista hnung zuitu an ni tih chhinchhiahna niah an ngai a, a duh zawnga hlen chhuah an tum tlat a ni. An va entawn tlâk êm! An nihna leh dinhmunte chu Chanchin Ñha puan darh nân an hmang ñangkai thiam êm êm a ni.

Mi hausa chhúngkua aţanga sei lian, tlâkchhamna leh retheihna awmzia hre lova seilian, a silhfen man to te leh a hmél ñatna vâng ngawt pawha mite ngaihsan hlawh mi pakhat a awm a. Zirlai a nih lain a piangthar a, a chhúngten an phurpui lo hle mai a; a ñhiante pawhin an en dân a danglam zo ta. An zirna hmun Cambridge-ah pawh thurualpui tûr a nei ta mang lo; mahse, a rinnaah a ding nghet a, a thuchahte

vàngin hmélma tam tak a neih phah hial.

A nun lo danglam ta avàngin tlàwmna nun leh mi dangte rawngbàwlsakna kawngah zir tùr tam tak a neihte zir chung zêlin rinna kawngah a lo puitling zêl a. Khawvêla mi ropui nihtír tumtute kawng pensanin, Lalpa tána mi ropui a lo ni a. Pastor-ah ãngin rawngbáwltu hlawhtling tak a lo ni ta. Chu mi chu Charles Sumeon-a a ni. Keini pawh Krista kan rinnaah hian i ding nghet ve ang u.

Pathian kan rinnaah hian miin min hriatthiam-pui piah lamah pawh rin tlat zêlna hi a ãûl tho zêl. Mahse kan din nghehna chu Pathian thu-ah ni zêl sela; kan rílrêm záwng leh duh záwng chinah ni lovin. Indona khawvêlah hian ***Lalpa tána dina nahet***

***tlat ringtute kan ni'*** kan intih ngam a ngai hle.

A hlâwk, a nuam, nalh, thar, hlimawm leh duhawm ùmna nun hian min ei chhiat loh nán leh chumi thanga táng kan ringtu-puite pui tùrin Lal Isua rinnaah chuan i ding nghet ang u. *'Krista sipai ãha tak angin hrehawm mi tuar pui rawh. Sipaia awm tùra thlangtu chu a tihlàwm theih nán, sipai tu mah indo lain tân dam chhúng khawsaknate hian a intihnawk ngai lo va,'* tia fuihna thu hi kan tán pawh thuchah pawimawh tak a ni. Rinnaah chuan in awm emaw nangmahni ngei infiahin inchhîn ãhin rawh u.

Hmun harsaah te, hun harsaah te, mi dangte nêna nun hona leh a fâla awmnaah te kan din ngheh ve theih nán Lalpan a thu malsáwm rawh se. Amen.

† America tualchhúng indo lai khán sipai General pakhat chuan, *"Hma lamah tháwm a reh a, a muanawm hle,"* tih thu hi vawi tam tak a thawn a. Mahse, *headquarters* a tang chuan - *"Muanna siam tùra tirh i ni lo tih inhria la; hmélmate chu beia, hnawt kîr tùra tirh i ni tih inhria ang che!"* tiin, zilhna thu déngkháwng tak mai a dawng thung!

***Eng thu nge min tírtu hnêna kan thlen ve ãhin?***

## **BUHHMUN ATANGIN LALPA AN RING MÊK**

*David Lalnunsanga Hmar  
Evangelist, Nagaon  
Mobile : 9401699596*

Tùn hnaia Nagaon, Assam Mission Field-a kan rawngbàwlna chanchin tawi têin tàr lan kan han tum ang e. Nagaon-a SMB rawngbàwl ÷an dân tlangpui lo thlir hmasa ila.

SMB Missionary hmasa ber, Pu Lalhmun-hluna Zote te chhúng chu ni 13 Jan., 2012 khán Nagaon-ah an lût a. Kan rawngbàwlna Lalpan mal a sàwm a, ni 28 Oct., 2012 khán Lalpan ringthar pahnih min pe a, Nagaon Fellowship-a Baptisma chang hmasa ber an ni.

Lalpan kan ÷awngtaina a chháng zêl a, ringthar baptisma chang kan nei ve zêl a. Thawktu pawh kan indah belh zêl a. Kumin 2017-ah hian Missionary 3 leh Field Worker 1 awmin rawng kan bawl mêk a ni. Kan fellowship member-te hi Muslim atanga rawn inlet vek an ni a, Nagaon khaw pawna awm deuh vek an ni bawh. A hla ber chu Km 22

vêla hlaah an awm a, Pathiannah an rawn inkhâwm vang vang ÷hin.

AMF-in kan target ber - Assamese zing atangin ringthar kan la nei lo a ni. *'Nagaon Fellowship-ah mi 10 tal kumin atán target insiam ve ila'* kan ti a. Pathian hnênah ÷awngtaiin kan dil reng a, kan feh chhuak reng bawh. Kohhran miten min ÷awngtaipui reng bawh. Tûnah hian Assamese hnam zingah Chanchin ÷ha chu a ÷iak ÷an ta a. Rei lo têah Lalpan a rah min sengtir ngei kan ring tlat a ni.

Nagaon khawpuih hian Catholic leh Assam Baptist kohhran te an awm a, an changtlung tawh hle. Keini chuan mi In kan la



luah a, inkhâwmna tùr pawh mi In luahin pindan lian vak lovah kan la inkhâwm a. Biak In neih kan châkin, kan nghâkhlel êm êm a ni.

BEC-in AMF Project List 2017 a pawm zingah Nagaon-a Biak In sakna tùr ram leina tùr nuai 15 a tel ve hlauh mai a, kan va lâwm tak êm! Mahse, a chhângtu tùr an awm loh chuan Biak In sakna tùr ram kan lei thei dawn si lo va; chuvângin, a chhângtu an awm ngei thei nân chhiartu zawng zawngten Pathian hnênah min lo dilpui rawh u aw.

Assamese-te hian mi Ina inkhâwm hi an hre thiam thei lo va. Biak In chu Biak In, In chu In tih hi an pawm dân nghet tak niin a lang a. A lian emaw, a tê emaw, anniho chuan a nalh leh mawi lam an thlir tehchiam lo. An rilrua lian ber zâwk nia lang chu - BIAK IN CHU PATHIAN CHENNA HMUN tih hi a ni. Biak In kan la neih loh avângin Inkhâwm tùra mi han sâwm pawh hi kan

ngâm zân ngai lo va, kan sâwm pawhin Inah chuan an rawn kal tha duh vak lo. Chuvângin, Kohhran din kan tum ta sâ sâ, Kohhran miten duh tâwk leh zalen taka Lalpa kan faka, kan biak theihna tùr Biak In kan neih thuai theih nân min lo ÷awngtaipui ÷hin rawh u aw.

### **Tùn hnaia kan rawngbâwlna chanchin ÷henkhat:**

Kan dilna Lalpan a chhâng a; Pu Ratul Bora, kum 47-a upa leh Pu Kumar Chetry, kum 72-a upa te chhúngkua chuan Isua an ring mêk a, rinna lamlianah Lalpan a hruai mêk niin kan hriaa, kan lâwm khawp mai.

Ni 28 - 31, March, 2017 khân Tezpur Pastor Bial chhúnga Evangelist ÷henkhat chuan Nagaonah *prochar* (feh chhuah) kan nei a. He *prochar* lai hian mi danglam tak mai chhúngkaw pahnih kan tlawh chhuak hlauh mai a. Kan bawhzui zêl a. Kan tlawh chhuah thar Pu Ratul Bora, hrawk *Cancer* vei leh

zai tawh, dam leh ta chu Good Friday aṅang khán a rawn inkhâwm ṭan a. Pathianni wawi khat chiah inkhâwm a la ṭulh a; a dam loh vâng a ni nghe nghe.

Pu Ratul Bora hian tûn hma aṅang khán a mumangah wawi 4 lai mai thlarauvin Biak Inah a lo hruai lût tawh ṭhin niin a sawi a. A mumangah chuan kawng thui tak hi a awm a, lehlam lehlamah mipui tam tak an awm a. A kal zêl a, a tâwpah chuan Biak In a lo awm a. A chhúngah a lût a. Pathian thu an lo sawi a, a sawitu erawh chu a hmu lo thung a.

A wawi khat rawn inkhâwmna tûrah Pu Ratul Bora hi kan va hmuak a. A bâk chu amahin a lo kal zêl ṭhin. ‘Engati nge i rawn inkhâwm ziah?’ tia miin an zawh chuan Ratula chuan, *“Ka thínlungah thlamuanna leh lâwmna ka nei tlat a. Nuam ka ti a, ka rawn inkhâwm ve zêl ṭhin a ni,”* tiin a sawi.

Pu Ratula danglamna bîk tak nia lang chu -

baptisma la chang lo mah se, an vengah leh hmun danga a hmelhriatte hnênahte Pathian thlamuanna a chan dân te, a channa hmun te, Pathian-nia a rawn inkhâwm ve dân te a lo sawi ṭhin a. A thil hmuh leh a hriatte a zêp bopui thei tawh lo.

Ni khat chu an inah lengin Pathian thu kan va sawi leh a. Eng emaw chen kan ti ti hnu chuan in dang pahnihah min hruai a. Chu mite pawh chu Pathian thlamuanna a chan dân te, a rawn inkhâwm aṅanga a nuna danglamna a thlen chhoh dân te a lo hrilh ṭhin a lo ni a.

Hun rei lo té kan ṭhut hnu-in kan ṭawngṭai a, chhuah zai kan rél ta a. Gate pawnah chuan ṭhahnem ngai tak maiin kan lenna chhúngkuate chu Pathiannah rawn inkhâwm ve ngei ngei tûrin a la sáwm ta fan a.

Gate pawnah chuan dingin heti hian a la sawi leh ta cheu va - *“Ka inkhâwm ṭhin avàngin*

*Pathian thlamuanna ka nei tawh a, nángni pawh rawn kal ve rawh u. A rei ngai lo va, darkar khat leh a chanve vèl a ni mai a. Rawn inkhâwm ve ang che u aw,”* tiin a la sáwm leh hrâm a ni.

Baptisma pawh la chang lo hian nasa takin a chipuite a vei êm êm tlat mai hian min tilâwm khawp mai. “In *prochar*-naah pawh in phal chuan ka lo kal ve zêl ang. Pathian thu kan sawi chuan ka hlim reng mai a. Zànah pawh ni se, a ùl chuan min rawn *phone* la, ka lo kal ve zêl mai ang,” tiin min chah nghe nghe.

Pu Kumar Chetry te rilru ngei pawh a tui ral òan niin kan hria. Kan tlawh pawh aòangin an chhúngkuain thlamuanna leh hlimna an dawng a; Isua Krista Chanchin Tha - Isua rin hi damna a nih dân te an hrethiamin an pawm tawh tak zet niin a lang.

A nupuiin, “Isua chu kan ring tawh a, mahse Kristianah kan lût thei lo vang. Khawtlang mipuite kan hlau. Min ensan dawn

si a,” a ti a. A pasalin a *counselling* ta daih mai. Lalpa chu fakin awm rawh se.

Pu Kumar-a hian fapa tlangval leh fanu nula pakhat ve ve a la nei a. ‘*Nupui/pasal an nei zawhah Kristianah kan lût ngei ngei ang’* tiin a sawi a. Chumi hma ngeia Baptisma an chan ngam ngei theih nán Pathian hnênah i dil zêl ang u.

An damloh laiin an Nepali Welfare-ten an ngaihsak leh ngaihsak loh te, rawn buaipuia rawn kantu an awm leh awm loh te ka zâwt a. Tu man an ngaihsak loh thu sawiin, “*Nangni hi kan chhúngte in ni tawh a. Kan vaiin chhúngkhat kan ni tawh,*” tiin min chháng a. Lalpan kan òawngòaina a chháng zêl a ni.

Lalpan kan dilna a ngaithla a ni tih a takin kan tawng mêk. Kan biak pawh òhinten thih pawh dân lova Lalpa Isua Krista ringa Baptisma changa, Isua hnung an rawn zui ngam ngei theih nán min lo òawngòaipui leh rawh u aw.

## “LALPA, NANGMAH CHAUH, I TAN CHAUH”

*Jennifer Lalremruati  
Kairabani, Jharkhand*

Kairabani Fellowship-ah hian member 64 kan awm a, a tlângpuiin member 40 vêl kan inkhâwm ðin. Kan fellowship member-te hi Santal hnam an ni a, an khawsak a la hniam angreng hle. A tam zâwkin ziak leh chhiar an thiam lo va; Êk in neih nachâng an la hre lo va, daiah vawkte nèn kan la inchâng kual ðin bawk. Zu an heh êm êm a, nuho pawh an bâng chuang lo. Inléng lo lâwm luh nán zu an lo pe bawk a; mahse, an zu in leh ruih ngaihtuah chuan insual buai leh intibuai an vâng hle.

Kan fellowship hi *silpaulin* zâr hnuaiyah kan la inkhâwm a, kan hlim ve dar dar ðin hle. Kan inkhâwmna in tùr sak tum hian kan thawk chhuak zing a nia; a châng leh ðenawmten min hau hrep a, kan ðiat leh a. A châng leh kan ram hawhna chhúngten min hawhtirtute an lo vau va; *temporary* deuh maia kan sak pum vek tawh leh inkhâwm nána kan hman ve nual tawh pawh ðiah leh a lo ngai leh a, kan ðiat leh hnu hnu zêl mai.

A châng leh mi in thim rek ruk, chêp zet, tukverh

pawh awm lovah kan inkhâwm a; chuti chung chuan kan hlim êm êm tho si. Kan inkhâwmna in chu inkhâwm nán a rem tawh loh hnu pawhin mi ram kan luah hawh a, *temporary*-a Biak In kan sakah nuam ti tak leh hlim takin kan inkhâwm leh thei zêl a.

Tûnah chuan mi inkawt bâk chan alâwi kan nei ta lo chu a ni a. Inkhâwm dawn apiangin *silpaulin* kan zâr chawp a, a chhuatah *silpaulin* tho kan phah a. Chairman dawhkan pakhat nèn inkhâwm chu kan tlingtla ve zêl a, nuam ti takin kan

zai ho leh dal dal tho si a nih hi. Lalpa hi kan tán a va ðha êm!

Chutih rual chuan, 'Engtin nge fùr lo thleng tùr hi *silpaulin* zàr ringawt hnuaiah hian kan hma-chhawn ang le? A phui lo nasa mai si a," tiin, kan mangang ðhin hle a. Mahse, Lalpan ro min rëlsak zël a, kan inkhâwm tibuaïin ruah a la sur lo zël chu a ni a, kan tán hian Lalpa hi a va ðha em!

Beidawng lova Kohhran-hote leh min ðawngðai-puitute zârah kan Biak In sakna tùr ram leina tùr a lo thleng hlauh mai. Mahse, ram zawn leh lei pawh a hautak khawp mai. Chumi hnuaiah Biak In sakna tùr Project List-ah kan han dah ve leh a, chhângtu an awm leh hlauh mai bawka, Lalpa kan lâwm e.

Mistiri zawn hna te, hmanraw lei khâwm hna te leh a ðûl ang ang kan han tiha, hna kan han ðan meuh chuan buaina a lo awm leh ta. *Ring rod* herh aþangin bul kan ðan a, ruahin min

tihbuaï theih loh nân tiin kan inkhâwmna In, kan ram leina te In ni bawkah hna chu kan han ðan tháwr phawt a. Chutia kan ðan mawlh mawlh lai chuan ram kan leina te fapa chu kan khaw lal (hotu) chuan a rawn ko a, eng tak ni ang maw tiin ka ngaichâng reng a.

A rawn luh leh mai tâk lohah chuan páwnah ka va bih dék dék a. Patling leh tlangval zu rui, mi pasarih vël hian kan khaw lal (hotu) chu lo fuihpawrhin, khawlaiah chuan an lo au a, an lo áng kual vël a lo ni a. Ka ngaithla reng a, a tâwpah an bulah kalin an thusawi chu ka ngaihthlâk chhunzawm a -

*"Hetah Biak In an sa tùr a ni lo..."*

*"Hêngho hian ram an rawn nei zël ang a, kan ral zël ang..."*

*"Engati nge nangmah ráwn lova ram an lei?"*

*"Engati nge an affidavit-ah i hming sign a tel loh?"*

Hêng, pàwr tak takho hi zu rui vek an ni a, ka thin an tirim tlat mai pek a. An duh tâwk an han sawi a, *affidavit* te chu an lâk chhuahtir a. An khaw lal (hotu) chuan ziaak leh chhiar a thiam loh avàng chuan a bula mite a chhiar chawptir dawn a; kei, a hmeichhe awmchhun chuan, “*Kha, en ta che u, kan ram lei hi ka hmingin a awm lo. In khaw hming vekin a awm, he ram hi ka ta tûr a ni lo, in ta tûr a ni,*” ka lo ti a.

A piaha zu rui, pàwr êm êm chu kâwk chungin, “*Nang pawh hei, affidavit hi i chhiar thiam em ni? Lehkha te hi zir that tûr, zu in in a, in rui a, eng mah thiam in nei lo,*” te ka ti piap piap mai a.

A hming sign-tute kha a chhiar thla leh diat diat a, zurui pakhat leh chuan khaw lal (hotu) hnênah chuan, “*Kha, i hming sign pawh a tel lo, i hriatpuina lohwin ram an lei a nih hi,*” a ti leh a.

Kei lah chuan, “*He khuaah hian ram in zuar a,*

*in hralh thin. Chûng zawng zawngah chuan khaw lal (hotu) hian hming a sign vek em?”* ka ti a. Ani chuan, “*Sign vek lo ve,*” a ti a. Kei chuan, “*Engati nge hetah a sign kher a ngaih?”* tiin ka zâwt lêt a. Zurui pakhat dang leh chuan, “*He khuaah hian Biak Ina awm tûr a ni lo, Biak In in sa tûr a ni lo,*” a lo ti a.

Lehkhatiam lo an ni si a, an hriatthiam dân tûra chhan a ngai si - “*Hei hi India a ni, Indian kan ni vek. India-ah hian engkim a free. Kan sak theih loh chuan President bulah ka complaint thei, an man daih mai ang che u,*” tiin ka chhâng leh hrâm a.

“*He khua anga sual khua hi ka hre lo. Hmun dangah chuan heti hian tu mah an awm ngai lo. He ram hi kan ram tûr a ni lo, in ta tûr vek a nih hi. Hetia in sual viau chuan in thi thuai hlâwm ang. Zu in heh si, lehkha in thiam lo si. Hetia min do chuan ka Pathian hnênah in tán ka tawngtai dawn a nia, in thi thuai ang,*” ka ti piap piap mai a.

Chutah zawng, an khaw lal (hotu) pawhin nui deuh titihin, “*Huina, huina,*” (a tâwk e, a tâwk e) zawi têin a ti sep sep mai.

Tichuan, pakhat tê tê chuan an kal bo pheuh pheuh a. Kei lah a lai takah dingin a ÷awng apiang ka en zêl a, ka hnial zêl mai si a. A bul lawk inah chuan tlêm tê têin an lût zeuh zeuh va, min hnial ngam pawh an awm tawh chuang lo. An khaw lalpa lah chu a bula ka din deuhvin a kalsawn zêl bawk a, tlêma ka biakin min nuih tlawn ang sen sen bawk a. Ani thleng chuan chu inah chuan an lût ta diak a, ka um zui zêl duh ta bîk lo.

Mahse, a piah lawka kan hnathawhna kawngka bulah chuan ka ÷thu ta reng a. A lo chhuak apiangin min en hrek hrek a; min kawm ngam chiah lo, hau ngam bawk si lo chuan an awm a, min nuihtlawn thul!

A tûkah chuan ‘Buaina an siam tâkin’ tih thu-ah hma takin ka kal leh a, eng mah buaina an siam chhonzawm lo hlauh. Ka

thisen a lo far ve ta a nih leh Krista vâng a ni dawn si a, ka va châk tawh tak êm! Krista vâng a tawrh rêng hi ka nei ve si lo.

Lalpan ram neih a ÷thulh dâwn lo. Lalpa zârah inkhâwmna in tûr chu kan va sual chhuak teuh tawh tak êm! Lalpa, nang fak zêl che hi ka duhsâm ber a ni. **‘Lalpa, nangmah chauh, i tán chauh’** kan ti vawng vawng mai a nih hi.

*“Kan hmaah sual ral te lo  
hráng mah se,  
Kan zâm lo, kan hlau lo,  
kan tawlh lo’ng;  
Hnehtu Lal Isuan kan hma  
a hruai zêl,  
Lalpa indona kan bei zêl  
dawn.*

*Indona chu Lalpa Indona a  
nia,  
Hnehna chu Lalpa ta a ni  
sia;  
Haleluiah tia hnehna hla  
sa zêlin,  
Hnehna kan puang zêl  
dawn, Hnehtu Lalpa fakin”.*

Min ÷awngtaipuituten min lo ÷awngtaipui leh zêl tûrin ka sâwm a che u.

**UDALGURI DISTRICT JAIL-A RAWNGBAWLNA**

*K. Lalhriatkima  
St. Paul High School, Bhairabkunda*

***“Thu chu hril rawh; a hunah te, a hun lovah te pawh bei  
zêl rawh; dawhthei taka zirtîr chungin an thiam loh  
hriattîr la, zilh la, fuih rawh” (2 Timothea 4:2)***

**A ò bul:** Pathian remruat fel tak mai hi a makin thil rêng rêngah hian chhan nei leh tum fel tak neiin rem a ruat a, ro a rél òthin tih hi phat rual a ni lo. He Jail-a rawngbàwlna kan neih theihna tùra bul a lo òtan dân leh rem min lo ruatsakna pawh hi a mak khawp mai. Kan rawngbàwlpui, Raphael Murmu-a, Kraws sipai atána Assam Mission Field-in a rawih mék chu he Jail chhúnga Pathian rawng kan bawl theih nán, sulsutu ni tùrin a lo tír lût rêng mai a (*Ramthar Chanchinbu August 2017 chhuakah a chanchin hi tàr lan a nì!*)

Jail-ah a tang a, a tirah hrehawm ti deuh mah se, a lo rei deuh va, a tlangnélin Jail chhúng pawh chu nuam a ti chho ve ta viau a. A theih ang angin Pathian rawngbàwlin a hun chu a hmang chho ta a ni. A thiante Pathian thu a hrilh a, òwngtái leh Pathian hlate zirtîrin Bible tract te a sem, Bible a chhiarsak baw òthin. Chu lai hmuna rawngbàwlna òtúl tak mai leh inhawng tak mai chu, Jail àtanga a rawn chhuah hnuah pawh chuan

a ngawih bopui thei hauh lo mai a. Bhairabkunda Mission Compound Committee beng a lo thleng ta. Compound Committee chuan Nipui chawlh laia Feh chhuah nán a thlang fel ta a ni.

**Inbuatsaihna:** Kum danga kan la tih ngai loh a nih avàngin inbuatsaihna dân tùr kan bangbo hle mai. Vànneihthlâk takin, Jail Superintendent leh District Dy. Commissioner te hnên àtangan phalna



kan hmu hlauh mai a, ni thum chhúng min pe a. Chu ni thum chhúng chu ni tin ruai buatsaih sak ngei kan duh a, a huphurhawm hle. Jail táng mi 240 zet zawt, Jail staff te leh vengtute mi 20 vêl nèn, keini lam ațangin mi 35 vêl zet nèn. Mihring 300 dawn ni thum chhúng zanriah tuihnai tak buatsaih chu kan tán chuan a namai lo hle.

Jail Superintendent Pu Mrinmay Kumar Deka chuan ruahmanna min siampui a. Mess atána ₹ 45,000 - 50,000 sèn ngai tura kan ngaih kha ₹ 23,000/- vêl a tâwk tûr thu min lo hrilh a, kan lâwm hle a. Sum mamawh zât kan hlan a, anni lamin ei leh in lam an lo buaipui ta vek a. Pu Mrinmay Kumar Deka, Superintendent hi pa fel leh zau tak mai a ni a, dawr a nuam hle. Silchar Synod Guest House-a a lo riah tawh thu, *room* fai a tihzia leh enkawl that a nihzia thu a lo sawi ve ziah thin.

He hun (*ni 21-23 July, 2017*) atán hian Kohhran inkhâwmah te leh

Compound inkhâwmah te Pathian hnênah kan țawngtai thin a. Chu bâkah kan țan hma zân thum chhúng chu, ‘*Thlarau lam inbuatsaihna*’ atán țawng-țaina hun kan hmang thin a. Zân khat phei chu chaw kan nghei a, a hlâwk kan ti hle. Pathian Thlarau Thianghlim awmpuina changin, hlim takin thlarau lamah pawh kan inbuatsaih thei a ni.

**Hun hman dân:** A bul țanna tûrin Compound ațangin chawhnu dár 1:00-ah kan thawk phei a. Jail Campus kan han lût chu Superintendent hovin, Staff te leh táng senior tawh thenkhatte chuan thingpui leh a hmeh tui tak nèn hlim takin min lo dawngsawng a. Jail-ah chuan pa rothap pui pui, pawisak nei lêm lo awm țeuh tûr ang tein ngaihtuahna kan nei a.

Boruak rit leh in-khuahkhirhna hautak tak kârah hun hmang tura inngai chungin Jail chhúng kan han lût a. Mi tángte chu an lo intlar pût mai a.

La inhmü ngai rêng rêng lote kan han inçhìbai kual dan dan ta mai a; boruak a muanawm nghal hle mai. Jail táng mi 130 vêl leng tùra tih, mahse mi táng mi 240 zet te nèn chuan hun chu kan han hmang chho ta a.

An *hall* chhúngah hian mi 180-200 bawr vêl chauh an leng a. Pathian fakna hla sain, Pu D.K. Baruah-an *testimony* sawiin bul a han tan a. An ngaithla uluk êm êm mai chu hmuh an nuam hle mai. Kan Speaker, Pu Ghana Handique-an Pathian thu - ***Ngaihdamna, Hmangaihna, Làwmna*** tih te thupuia hmanganung tak leh tang êm êma thu a sawi lai te chuan tu mahin khaw dang hawi zai rêng an rél lo. An ngaithla thain an mit leh beng an dawh uluk hlawm êm êm mai vek a ni. Programme zawh, chaw puar taka kan ei zawh hnuin kham lo takin a ni khatna chu kan hmang zo ta a.

Ni 22 (Inrinni)-ah pawh chuan kan thlen veleh Jail thuneitute chuan ei tùr

tharlám tak min lo hlui leh a. Jail chhúng chu lûtin programme kan han tan leh ta. Superintendent ber hi a phur êm êm rêng mai a. Hindu pachal ni siin tângho chu Pathian hla a sakpui dual dual mai roh va. Sawi tùr a ngah êm êm rêng mai a. A ni khatna atang tawhin *Chairman* kan han inruat ve te pawhin min kaihruai hlei thei lo khawpin tang a tui tam ta thin a. Rilru a la peng thui ang tih a hlauhawm duh thin khawp mai.

Bodo tleirawl rualten lam mawi tak min entír hnuah kan Speaker-in hun a hmang leh ta. ‘*Chhandamna thu*’ nung tak maiin a puang chhuak leh ta. A ropui khawp mai ‘*Thil tih that leh finna ringawtah chuan chhandamna a awm thei lo, khawngaihna leh rinna atang chauh lo chuan*’ tih thu an sawi chhoh phei chuan *hall* chhúnga awm zawng zawngte min hneh tlang hle niin a hriat. Zanriah kan ei hnuin, kan tinsan leh ta rih a.

Pathianniah chuan Kohhran programme a

zawh vek hnuin, a ni thumna leh a tâwp berna ni atán kan chhuak phei leh ta. A hma ang bawkin, tha takin min lo dawng-sawng a. Programme ñan a ni a, Nepali lâw mawi tak mai kan thlir hnuin, Jail tángte aţangin zai leh thusawite kan ngaithla chhonzawm baw a. Nuam ti tak leh thlamuang taka kan zinga an *talent* te an han pho lang ve ñhin chuan min tihlim ñhin hle mai.

Kan Speaker, Pu Ghana Handique-an Pathian thu, ***‘Thuawihna leh Rinawmna’*** tih hmangin minute 40 vêl lai mai tha takin a sawi a. Tu mah khaw dang hawia ngaihsak lo hmél rêng rêng an awm lo. Khati khawpa khaw lum kárah khán ning hmélpu an awm lo mai pawh ni lovin, rilru pe takin Pathian thu an dawngsawng niin a hriat. In chhúng lama mi chu sawi loh, a chhúnga leng lo, pawn lam tukverh aţanga rawn dâkte pawhin kalsawn zai an rêl miah lo bawk.

Speaker-in thu a sawi zawhah St. Paul School Headmaster, Pu C. Lalrinnan lâwmthu a sawi a. Superintendent thilpêk hlanna hun hman a nih zawhin, Compound lama kal zawng zawngten dingin (*mi dang zawng an ñhu a*) ‘Lalpa Tawngţainaa’ inhlanin *programme* kan han khâr chu a ropui dangdai hle. Páwnah rawngbâwltu ñhenkhatte an lo intlar a. Jail táng, a mal tê têa chhuakte chu Bible (*Thuthlung thar leh Sâm*) an lo pe diat diat hlawm a. Zanriah kan kíl ho zawh hnuah kham lo takin kan ñinsan ta a ni.

**Lâwmthu:** Pathianin a rawngbâwl thei tûra vawiin thlenga min hruaia, rawngbâwlna hun tha leh hmun tha min la buatsaihsaka, rem min ruatsak hi ropui kan ti a. A hnênah lâwmthu kan sawi a ni. Tûnlaiin India ram pumah Hindu sakhuana tichak tûra nasa taka ñan lâk a ni a. Hetih laia duhtâwka Pathian thu sawi min phalsaktu Jail

chhúnga thawk *Superintendent* leh a thawhpuite chungah kan lâwm hle. Hun chêp tak kára Speaker leh testimony sawi tùra kan sàwmna leh ngenna ngaipawimawha rawn tihlawhtlingtu, Guwahati lama kan rawngbàwlpui Pu Ghana Handique-a leh Pu. D.K. Baruah-a te mai bâkah, helaia an rawn kal theihna tùra remchâng siamsaktu kan Field hotute chungah kan lâwm tak zet a ni. Hun chêp tak kára zai tùra kan ruatte leh lâm mawi takten kan *programme* an tihlu a, an chungah kan lâwm hle a ni.

**Tlangkawmna:** A tâwp ber atán chuan, thil tihsual vâng a he khawvêl dân pawhin thiam loh a chantír, Jail bang sâng tak hung

chhúnga táng mai ni lo, sual bawha táng mékte chhan chhuak tùr hian kan theihna leh thil tih a tlém tih kan hria a. Mahse, an thinlungah Pathian Thlarau Thianghlimin thu a sawi chhunzawm zêl ang a; engtik hunah emaw chuan an zínga tute emaw tal chuan Pathian khawngaihna changin, an sualte sima, chhandam an nih ngei hi kan rinna, beiseina leh ÷awngtaina a ni.

*‘Pathian mi thlante chu tuin nge hék ang? Thiam chantírtu kha Pathian a ni si a. Tuin nge thiam loh chantír ang? Thia kha Krista Isua chu a ni si a; a ni, tho leh ta zâwka, Pathian ding lama awma min sawisaktu bawka kha a ni’* (Rom 8:33-34).

**Missionary ropui, Robert Moffat-a (1795-1883) kha South Africa** rama Bechuana hnam zínga a thawh tih khán khaw chhúnga harsatna a awm apiangin amah chu an mawhpuh zêl ÷hin. Ni khat chu chumi khaw lal chuan a mite rawn hruaiin, Missionary chu thah ngei tumin an rawn thawk ta a. Moffat-a chuan, “I thalfang khán i duh chuan min that thei e,” tiin, zâm hauh lovin a kawrchung hma chu a phelh a. Ràlkhat aṭangin a nupui chuan an naute pawm chungin ngawi rengin a lo thlir bawk a. An lal chuan mak a ti hle. A hote lam hawiin, “Hêngho hian nunna sàwm an nei a ni ngei ang, thih an hlau lo êm mai!” a ti ringawt mai. He khuaah hian hlawhtling takin rawng an báwl zui a, a ram mite nginat leh rin an hlawh hle.

## MISSION RAWNGBÀWLNA PAWIMAWHZIA

*Rev. C. Thalai*

Lal Isua thupêk pawimawh ber chu khawvêla Chanchin Ṭha hril hi a ni a. “*Khawvêl zawng zawngah kal ula, thilsiam zawng zawng hnênah Chanchin Ṭha hi hril rawh u,*” tih hi Apostol-hote hnênah chauh a pe lo va, keini pawh Chanchin Ṭha nunna thu hril ve tùrin he thuneihna hi pêk kan ni ve tih hi i hria ang u.

**Chanchin Ṭha hril pawimawhzia:** Lal Isua vâna a lawn lai khân hetiang hian thu ropui tak a sawi a: “*Thlarau Thianghlim chu in chung a lo thlen hunah thiltih-theihna in la nei ang. Jerusalemah te, Judai leh Samari ram khaw tinah te, kawlkil thleng pawhin ka thu hretute in ni ang,*” tiin (Tirh 1:8).

Jerusalem aṭanga Chanchin Ṭha hril tùra thu a pêkna chhan chu – Jerusalem chu Pathian chènna hmun ber a nih avàng a ni a. Chhúngkua hi a bul ṭanna hmun a ni bawk. Chuvàngin, chhúngkua aṭanga ṭan hmasak tùr a ni tih a entír.

Bible aṭangin kan thlir hmasa ang. Isua chuan

mipuite a hmuhin a lainat êm êm a, véngtu nei lo berámte anga hrehawm leh darha an awm avàngin a khawngaih ta êm êm a. Tichuan, a zirtírte hnênah chuan, “*Buh seng tùr a tam hle si a, nimahsela a thawktute an tlém; chutichuan a buh seng tùra thawktu tùrte tír tùrin buh neitupa hnênah chuan ngen rawh u,*” min ti a (Mt 9:36-38).

**Missionary-te leh Pastor-te hriat tùr:** Rev. Liangkhaia khân, “*Pathian kohna âw hre lova rawngbâwl chuan hrehawm leh harsatna an tawhin an bei a dawng a; chuvàngin, an rawngbâwl a chak tùr angin a chak thei lo. Pathian kohna âw hre tak taktute erawh chu harsatna leh hrehawmna an tawh leh sawi chhiat leh elrèlna*

*an tawh pawhin rawng-bàwlna hna chu hna zawng zawnga hna ropui ber a ni an ti a ni,”* tiin, a sawi.

Richard Wumbrand-a, Romani rama missionary ropui, lei hnuai feet 36-a thûka kum sawm leh pali an tàntír chuan, “*‘Ka ring’, ‘rawng ka bawl’* inti sia harsatna te, hrehawmna leh thlêmna te tawk lo chu mi vànduai leh mi khawngaihthlâk ber in ni,” tiin a sawi.

Krista leh a Chanchin Ṭha avànga hrehawmna leh harsatna tuar tam apiang hi missionary ropui an ni zêl ṭhin. India rama missionary pahnihte chu tuifinriatah heti hian an ṭawngṭai a: “*Lalpa, India ram miten nangmah an chawimawi theihna tûr a nih dawn chuan tuifinriat vaukamah hian meîn min hal hlum mai rawh se,*” tiin. An nunna zawng zawng an hlân vek tihna a ni. He mite pahnih ang hian missionary zawng zawngte hi inhlân vek thei sela chuan Pathian ram chu engti takin zau ang maw?

**Mission rawngbàwlna hi muang thei a ni lo:** “*Thi tûra an hruaite chu chhan chhuak la, thi mai tûrte chu chhan chhuak thuai rawh. ‘Ngai teh, hei chu ka hre lo,’ i tih mai chuan thinslung bûktu chuan a ngaihtuah dawn lawm ni?’*” (Thuf 24:11,12) tiin Bible-ah kan hmu.

“*Thi tûra hruai’* tih hian ngaihtuahna thui tak min neihtír a. Kan hriat ṭheuh angin Myanmar aṭangin India ramah bawng te, sial te leh lâwi te an rawn zuar ṭhin a. Kawnga an inzui lai chuan an ei tûr hnim te an pe zêl a, an hlim êm êm a. Amaherawhchu, India ram an rawn thlen chuan an talh a, an sate chu bazar-ah an sêr leh mai ṭhin a ni.

Chutiang bawkin Setana hian khawvêl mite chu an duh zâwng hmangin chatuan thihna, meidil lamah ama hnêna awm tûrin mi sâng tam tak a hruai mék a, chhan chhuah an ngai hle a ni.

Hla phuahthu hian a lo hmu Chiang khawp mai – ‘I

*thawh loh avàngin tam tak an boral e...Dâk chhuak la, en vêl teh, tlanna hrelote hi...'* a lo ti a. 'Buh seng tùr a tam hle a, thawktute an tlém' tih ziak ang khán Chanchin Ṭha hril hi a pawimawh êm êm a, muang lovin i thawk ang u. Bible chuan, "Chatuan nunna neihtírna khawp kan Lalpa Isua Krista khawngaihna chu nghâk chungin Pathian hmangaihnaah chuan in-vawng ṭha rawh u. Ṭhenkhat ringhlela awmte chu khawngaih rawh u, ṭhenkhat mei ata la chhuak thuai ula, chhandam rawh u," (Juda 22-23) tiin min hrilh.

Meiin in a kàng lai leh khaw kàng lai hi ka hmu tawh a, rin ai leh ngaih aiin a râphtlâk zâwk daih a ni. In kàng chu a muangcháng ngai lo. In a kan laia kan rilrua lian ber chu inhumhimna hi a ni.

**Buh seng a hun ta:** Hêng thute hi lo en leh ila: "Ngai teh u, ka hrilh a che u, dâk ulang, lote en rawh u, tùn apangin seng tùrin a êng a ni" (Joh 4:35). "Tin, ka han en a, tin, ngai teh,

*chhûm vâr ka hmu a; tin, chhûm chungah chuan mihring fapa ang tak hi rangkachak lallukhum khuma favah hriam tak kenga ṭhu ka hmu bawk a. Tin, vantirhkoh dang, Pathian biak in atangin a lo chhuak a, chhûm chungah ṭhu hnenah chuan aw ring takin, 'I favah kha phawrh la, ât rawh; ah a hun tawh si a; lei buh khu a ngui tawh khu,' a ti a"* (Thup 14:14-15).

'Ngai rawh, Lalpan a grep huanah' tih hla phuahu hian Chanchin Ṭha hril hmanhmawhthlâkzia min hrilh Chiang hle. "Thawk thuai la...Kan thawk thei tawh lo vang" tiin, hmanhmawh a ṭulzia min hrilh.

**Missionary-te hi fak tlâk an ni:** Phai ram, ni satna hmun leh zo thlifim awm lohna hmun, boruak ûp churh hmuna an awm thei mai te hi han ngaihtuah teh - missionary-te hi fak tlâk an ni. Malaria tamna hmunah te an awm a, an nunna pawhin a tawi phah hial ṭhin.

**Missionary-te Sikul:**

Tûnlai khawvêla intlansiak-na ber chu zirna hi a ni. Khawvêla zirna sang ber chu University a ni a. Missionary-te zirna sikul erawh chu Isua Krista hre lote zingah a ni a. Chî leh hnama lang pha lo, thlalèr ram rova chêngte ṭawng an zir a, hla bu leh Bible te an ṭawngin an siamsak a. Hei hi missionary-te rawngbâwl-na danglamna leh ropuina chu a ni. An sikul chu Kalvari sikul a nih avàngin Vàn nèn an inzawm a, lei mihring ni mah sela Vàn ramah chuan a lian ber an la ni ang a, an la ropui ber ang. Thlarau bote Isua ke bula hruaitute chu Vâna arsi angin chatuanin an êng reng ang (Dan 12:3). Haleluia! Lalpa kan Pathian chu chatuanin fakín awm rawh se. Amen.

**Tûnlai khawvêl:** Bible thu a lo thleng dik mék. *“Chûng hunah chuan hrehawm tuar tûrin an mantír ang che u a, an tihlum ang che u,”* tiin Lal Isuan a lo sawi lâwk tawh (Mt 24:9). Kan hriat theuh angin tûnlai hunah khawvêl

hmun tam takah Kohhran tihduhdahna a pung zêl. Missionary pakhat lehkhabu ziah ka chhiar a – *‘Bazar-a thîl lei tûra chhuah te hi a va huphurhawm êm! Engtikah nge bomb-in mìn paih khum ang, tih ngaihtuahin ka thla a muang thei lo,’* tiin a ziak a ni.

Tûnah hian khawvêl hmun tam takah Kristian tihduhdahna a nasa hle a, an dam chhúnga Lung Ina táng te, khândaiha an sah te leh an inkhâwmna ina *bomb* an tihpuah te. Chu chauh pawh a ni lo, tûnah hian martar-te thisen a luang mék a ni.

Lalpa rangkachak buhphalte an ngui zawh hma hian ramthar rawngbâwl-na hi ṭhahnemngai lehzualin i thawk ang u. *‘Kristian, tho r’u, mu rei s’u’* (KHB 393) tih hian kan thupui hi a rem hle.

‘Mission rawngbâwl-na pawimawhzia’ tih thupui hmanga tling lo taka ka ziah hi, ka ziah aia ṭha zâwkin a chhiartu zawng zawng tán Lalpan malsâwm rawh se. Amen.



**PATHIAN MIN KOHNA ZAWN ZÊLAH HIAN  
FIMKHUR TAKIN I THAWK ZÊL ANG U**

*Upa BH Mokendro  
Chakma Gospel Team,  
Marpara Ramthar*

Pathian min kohna âw chu hriain a hna thawh thawk chhonzawm zêl tûr hian harsatna leh hrehawmna kârah pawh taima tak leh rinawm takin i thawk zêl ang u.

Hei, a hnathawh thawk chhonzawm zêl tûr hian kum 1997-ah khân Pathian kohna ‘âw’ ka dawng a. Tun thleng pawhin harsatna leh buaina tâwk lovin Pathian kaihhruaina ka dawng zêl a. Khaw hrang hrang te fang kualin kan Chakma unaute hnênah ka theih ang tâwkin ka thawh chhonzawm zêl theih avàngin Pathian hnênah làwmthu ka sawi a ni.

*‘Chakma tân Kristian nih hian Mizo nihna leh hnam bo nihna,’* tia kan Chakma unauten an sawina chhan nia ka hriatte kawng thumin tár lang ila:

**1. Ṭawng hman chung-cháng** - Pathian rawng-báwlto Chakma-te hi ṭawng hmanah hian fimkhur zêl thei ila, a làwmawm ngawt ang.

Kan unau Chakma-te zingah Pathian rawngbáwlín kan awm mêk a, rawng-báwlto chhúngkua hi kan pawimawh êm êm a ni. Inlêng kan nei ṭhin a, kan lo dawnsawn dânah te, ṭawng thuah te inlêngte ngaih dân a ni em? tih kan ngaihtuah fo a ngai a. Chakma leh Chakma kan awm pawhin Mizo ṭawng hi chhúngkua anga kan uar leh lutuk hian dem kan hlawh a, ‘Mizo’ tih leh ‘hnam bo’ tih hi kan hlawh ṭhin tih i hria ang u. In chhúngah leh pawn lamah Chakma ṭawng hi i hmang uar zêl ang u.

**2. Culture chung-cháng** - *Culture* hi hnam tinin kan ngai pawimawh vek a. Hnam *culture* anga kan awm loh hian ‘Mizo nih’ leh ‘hnam bo nih’ kan hlawh

nia hriatna kan nei a. A bîk takin, kan Chakma rawng-báwltu chhúngkua hi kan hnam zingah rawng-báwla kan awm m êk lai hian a theih chin chinah kan *culture* hi hmang zêl ila a tha ang. Kan unaupui Chakma-ten min dem lohna tûrin a tha zâwk kan hriatte i hmang thin ang u. Kan nupuite pawhin Chakma nihna dik tak tilang chhuakin *shawl* leh puan bih te pawh Chakma puan leh *Hadi* te hi bat sela, kan hnam mila rawngbâwl kan nih tilang thin ila. Biju te a lo awmin kan Chakma unauten hmanlai aţanga an hman than tawh avângin an ti zêl a. Keini Pathian rawng-báwltute pawhin a tha chinah i zawm ve ang u.

**3. Hming put hlen chungchang** – Hming sak chungchangah hian ngaih-

tuahna thui tak i hmang ang u. Kan Chakma Pastor Lalrinsanga ni thin kha, **Pastor Sujindro** tia a lo thlâk ta mai hi entawn tlâk tak a ni. Kan Chakma unauten Chakma ni si, Mizo hming nei hi Mizo nihnaah an ngai tlat thin a ni. Chuvangin Chakma zinga rawngbâwl kan niha Chakma hming kan neih chuan kan Chakma hming hi puin inkohna atân pawh hmang ngei ila a tha a ni. Dem kan hlawh loh nân i fimkhur ang u.

Sawisela kan awm loh nân (Mt.7:1), II Tim.4:5 *‘Nang erawh chu engkimah fimkhur la, hrehawm tuar la, i rawngbâwlna kha hlen rawh’*. Kan Chakma unaute zinga chak zâwk leh hmasâwn zâwka rawng kan bâwl theih nân hêng thu hmang hian i harh thar ang u.



*Tichuan, Judate ka lâk luh theihna tûrin Judate hnênah Juda mi angin ka awm thin; Dàn hnuaia awmte ka lâk luh theihna turin Dàn hnuaia awmte hnênah Dàn hnuaia awm angin ka awm thin, Dàn hnuaia awm si lovin; dàn nei lote ka lâk luh theihna tûrin dàn nei lo te hnênah dàn nei lo angin ka awm thin, Pathian dàn âwih lo si lovin, Krista dàn zàwm siin (1 Kor 9: 20-21).*

**RAMTHAR FEH****1.**

- 1. Field Hming** : Cachar Tlangram' Barak Area  
**2. Khua** : Silchar  
**3. Tlawh hun chhúng**: Ni 17-25 Oct., 2016  
**4. Tlawhtu** : Lungdai Kohhran  
**5. Kal zât** : Mipa 9, Hmeichhia 1  
**6. Tlawh chhan** : Hnathawh  
**7. Hnthawh** : Pastor quarters [Silchar Bial (Mizo)]  
 Ceiling siam leh Electric Wiring  
**8. Senso zât** : ₹ 20,000/-  
**9. Làwmawm lam** : Administrative Secretary, Rev. Z.D. Lalmachhuana hovin thawktuten phur takin min lo dawng sawng a, ei leh in, riahna thlengin nuam takin min thleng a. Kan hnathawh chhúng zawngin thawktuten min tlawh reng a, min duhsak êm êm bawk a ni.

**10. Report tûl dang** : Pastor quarters (36X34 ft) leh varanda (12X10 ft) chu *Tile* (4X4 ft) 84 vêl lai hmangin kan bel zo va. Electric wiring pawh kan zo fel vek bawk a ni. Zing dár 6:00-ah hna tanin, zân dár 8:00 thleng kan thawk tlangpui. Tu mah harsatna tâwk awm lovin Pathian hruainain tluang takin kan zo thei a, kan lâwm hle a ni.

*R. Thuamluaia, Ramthar Ziaktu*

**2.**

- 1. Field Hming** : Tripura Mission Field  
**2. Khua** : Kameswar leh Pecharthal Kohhran  
**3. Tlawh hun chhúng**: Ni 1-5 December, 2016  
**4. Tlawhtu** : Sailam Vêng Kohhran Hmeichhia, Chhiahtlang  
**5. Kal zât** : Hmeichhia – 25; Mipa - 3  
**6. Tlawh chhan** : Kan Kohhran ațanga Misionary chhuak thawhna hmuhpui  
**7. Hnathawh** : Missionary Qtrs Compound sam fai  
**8. Senso zât** : ₹ 65,500/-  
**9. Làwmawm lam** : Ni 1 (Ningani) zing dár 4:45-ah Chhiahtlang ațangin kan chhuak a, kan tlawh tùr Kameshwar chu zân dár 1:30-ah kan thleng a. Chu bâkah kan Kohhran Committee Chairman Upa R. Chhuanthanga leh Upa C.

Ramhnginglova ten ei rawngbáwl tùrin min òawìawm a, an chungah kan làwm hle. Kan Kohhran àtanga Missionary kal chhuak Pi Lalbuatsaihi te, a thawhpui Pu O. Deben Singh leh a nupui Pi Ibemhal Devi (Nurse) te leh Kohhran mi eng emaw zàtin min lo hmuak a. Thingpui leh a hmeh tui tak min lo hlui a, an chungah kan làwm êm êm a ni.

**10. Report òùl dang :** Zirtawpni chawhmaah Missionay Quarters Compound kan sam fai a; chawhnuah Pi Lalbuatsaihi Misionary hovin, Kameshwar Kohhran ringtharte kan tlawh a, hêng kan tlawhte hi Meitei nham an ni.

Inrinni zingah kan kohhran àtanga Missionary kal chhuak baw, Pi Rosy Chawngthantluangi (E/T) thawhna, Dàrchawi Biala Pecharthal chu kan tlawh leh a. Pecharthal KTP-in Missionary chhúngkua 11 awmte hnênah min thlen darh tirin tükthuan kan ei a. Kohhran Hmeichhiaten Biak Inah òawngtài hona min neihpui hnuah Group li-ah inthenin Pecharthal Kohhrana ringthar chhúngkuate min tlawhpui a. Hetah hian kan Kohhran àtanga Missionary-a chhuak baw, Nula Rosangzuali (E/T) Tuidu-a awm chu a rawn tel baw a, a làwmawm hle a ni. Zànah Kohhranhovin inkhâwmna min neihpui baw.

Kan Mission Field tlawh, Kameshwar hi thawmhnaw bag riat kan pe a; Pecharthal Kohhran hian thawmhnaw bag sarih kan pe a, ₹ 10,000/- ve ve kan hlan baw.

Pathianni-ah Kameshwar Kohhranah Chawhma leh zànah kan inkhâwm a, chawhnuah Kohhran Hmeichhe pualin kan inkhâwm ho baw. Inkhâwmna kan neihna apiangah a kalhote thusawina min chantir vek a ni.

Thawhtanni zing dár 6:00-ah Kameswar àtangan Silchar lamah kan haw ta a. Kan Kohhran àtanga Missionary-a chhuak baw, Pu Ngurliantawna, Bualpuia thawk chuan Silchar-ah min lo hmuak a. A thawhna, Bualpuiah an chhúngkuain zanriah min lo buatsaihsak a, an chungah kan làwm hle mai. A tük, thawhlejni tlai dár 3:00-ah Pathian hruainain Chhiahtlang chu kan thleng leh ta a ni. Pathian chu fakin awm rawh se.

*Lalramhmuaki, Kohhran Hmeichhe Ziaktu*

**3.**

- 1. Field Hming** : Arunachal East
- 2. Khua** : New Khamlang
- 3. Tlawh hun chhúng**: Ni 14-27 March, 2017
- 4. Tlawhtu** : Chite Véng Kohhran
- 5. Kal zât** : Mipa – 23; Hmeichhia - 1
- 6. Tlawh chhan** : Hnathawh
- 7. Hnathawh** : Sikul (20X20 ft)-a zauh a nih bâkah, sikul chung (80X20 ft) leh thawktu Quarters pakhat chung rangva rialin a den chhiat chu siam thât a ni. Compound Gate chhia siam thât a ni bawk.
- 8. Senso zât** : ₹ 79,887/-
- 9. Làwmawm lam:** Kan kal chhan tak, sikul zauh bâkah hna dang tam tak kan thawk thei a. Tin, kan chàm chhúngin khaw chhia leh thil dang avànga hna thawh theih loh kan nei miah lo bawk. Hetianga Pathian min hruaina avàng te, thawktute inpékna leh kohhran mite min òàwiàwmna zawng zawngah kan làwm hle. Field Secretary, Rev. Lalrinthara leh Bialtu Pastor Pusam Rikhung ten a hmunah wawi eng emaw zât kan hnathawk min rawn tlawh a. Field Secretary hian kan haw lam Ledo (Train Station) thlengin min thlah nghe nghe a, kan làwm tak zet a ni.

**10. Report òùl dang** : Ni 14.03 2017 (thawhlejni) chawhnu 1:20-ah Aizawl àtanga chhuakin, ni 16.03.2017 (Ningani) 9:55 a.m.-ah New Khamlang kan thleng a. Kan thlen ni hian ban khur panga kan laih zawh vek bâkah, ban pathum kan tung hman a ni. Ni riat chhúng hna kan thawk a; thawh tùr a tam a, kan òùl tláng mawlh mawlh hle. Staff Room sak thât ngai erawh rilrua riak reng chungin kan khawih hman ta lo. Ni 24.03.2017 (Zirtawpni) tlai dár 2:00 vèlah hna kan zo fel thei a. Ni 25 (Inrinni) 10:20 a.m.-ah New Khamlang chhuahsanin, tuang takin thawhòanni zing dár 9:00-ah kan véng kan thleng.

*Zothansiam, Ramthar Ziaktu*

**4.**

- 1. Field Hming** : Home Mission South
- 2. Khua** : Hmawngbu
- 3. Tlawh hun chhúng**: Ni 20-24 March, 2017

- 4. Tlawhtu** : I.T.I. Vengchhak kohhran, Aizawl
- 5. Kal zât** : Mipa – 13; Hmeichhia-2
- 6. Tlawh chhan** : Hnathawh
- 7. Hnathawh** : i) Staff Quarter – 11 nos, Biak in leh Sunday School Hall Electric wiring. ii) Headmaster Quarter pindan tûr siam leh tûkverh darthlalang vuah. iii) Biak in thar sak kal mék ban 9 chhun. iv) Keyboard siamthar.
- 8. Senso zât** : ₹ 87,739/-
- 9. Làwmawm lam** : Ni 20/3/2017 zing dár 6:10-ah Upa Kapzauva, kohhran Committee Chairman–in Pathian hnêna ãawngtaiin Work Camp kal tûrte min thlah a, ruah a sur avàngin ruahmanna angin Hmawngbu hi kan thleng hman ta lova. Zàn dár 11:00 ah Hmawngbu kan thleng a, thawktu awm ang angten min lo dawngsawng a. Zanriah ei fela mut a hun meuh chuan zàn dár 12:30 a lo ri hman tawh a ni. Headmaster Quarter sak thar, la zawh loh deuhvah kan invawm lût a. Upa H.Roenga, Ramthar Committee Chairman leh Bialtu Pastor C.S. Rila ten Work Camp hi min uap a ni. Ni 21/3/2017 ațangin ãhahnemngai takin hna kan thawk nghal a, chutianga ni thum chhúng kan thawh hnu-ah hnathawh tûr angte kan thawk zo a ni.
- 10. Report țul dang** : Hmawngbuah hian Evangelist Teacher 14 leh Health Worker pakhat an awm a, kan kohhran sikul (KG- Class VIII) a awm bawk. In 180 awmin, a mi chêngte hi Bawm leh Mara an ni. Presbyterian kohhran puitling 1 a awm a. Upa 7, Tual Upa 2 leh Kohhran member 326 an awm. Dan zawkim hi 201 an awm a, kan kohhran mite in hi 70 a ni. Kohhran Hmeichhia, KTP, Pavalai leh Sunday School te mumal taka kalpui a ni. Kan kohhran bâkah, LIKBK, BCM, ECM leh UPC (Mizoram leh NE) te an awm bawk. Synod Mission Board hma lâkna leh kan missionary te hnathawh a ropui hle a. Tûnah hian Biak In thar an sa mék a, hmabâk an la ngah hle a ni. Kan hnathawh te tluang taka zovin, ni 24.3.2017 zànah tluang takin Aizawl kan thleng leh a. Pathian awmpuina leh kaihhruaina nasa tak kan dawn avàngin kan lâwm hle.

*Lalremtluanga Varte, Ramthar Ziaktu*

**5.**

- 1. Field Hming** : Home Mission North
- 2. Khua** : Teirei Forest
- 3. Tlawh hun chhúng** : Ni 27.3 – 1.4.2017
- 4. Tlawhtu** : Vaivakawn Kohhran Pavalai Pawl
- 5. Kal zât** : Mipa 12
- 6. Tlawh chhan** : Hnathawh
- 7. Hnathawh** : Biak In zauh
- 8. Senso zât** : ₹ 24,640/-

**9. Làwmawm lam** : Ni 27 (Thawhtanni) zing dár 7:00-ah kan Chairman, Upa K. Lalthuamluaian tawngtaiin min thlah a, tuang taka kalin chhun dár 12:30-ah Teirei Forest kan thleng. Kohhran Committee-in min lo dawngsawng a, kan riaha tûr an lo buatsaih (V/C House changtlung tak)-ah kan inthiar lût a. Thingpui te ina kan hahchawlh hnuah kan hna thawh tûr leh thawh dân tûr kan en fel a. Tlai ni nèm chuhin kan thawk nghal a, liang kan hláng. Ni li chhúng zing aţanga ni tlâk thleng ngawrh taka thawkin, Biak In (24X15ft) zauhna chung chih, Ceiling siam, Vestry sak, tûkverh, kawngkhar vuah, etc. chu tuang takin kan zo thei a ni. Work Camp kal nán hian Pu P.C. Vânlalruatkima chuan hlâwkna ûm hauh lovin kan chàm chhúng atán a motor min pe tawp mai a, a chungah kan làwm hle a ni.

**10. Report tûl dang** : Teirei Forest hi Bru khua, Dampa Tiger Reserve Area bula awm a ni a. Kum 1981-ah Kohhran hi din a ni a, tûnah hian Kohhran member 187 niin dân zawhkim 98 an awm a, Kohhran Upa 3 leh Tual Upa 3 awmin Damparengpui Pastor Bial chhúnga awm a ni. Kohhran dang, Bru Baptist Church leh Salvation Army an awm ve bawk. Work Camp chhúng hian Kohhranin kan tán thuhiril rawngbâwlna hun siamin inkhâwm an lo buatsaih a, Lalpa rinchhanin kan zinga rawngbâwltu pahnihten thuhiril rawngbâwlna ţha tak an nei thei a, kan làwm hle a ni. Lalpan tisa leh thlarauva rawngbâwlna hun ţha min siamsak hi a ropui kan ti a, Work Camp-a kal te leh Teirei Kohhran mipuiten kan hlâwkpui hlein kan hria a ni. Lalpan ropuina chang zêl rawh se.

*R. Hmingthanzara, Pavalai Pawl Ziaktu*

**6.**

- 1. Field hming** : Home Mission South
- 2. Khua** : Devasora South
- 3. Tlawh hun chhúng**: Ni 31 March – 8 April, 2017
- 4. Tlawhtu** : Bethlehem Kohhran
- 5. Kal zât** : Mipa - 11
- 6. Tlawh chhan** : Work Camp
- 7. Hnathawh** : Missionary Quarters (24 X 21 ft) sak
- 8. Senso zât** : ₹ 70,834 /-
- 9. Làwmawm lam** : Upa R. Lalfaklian an tawngtaia min thlahin, ni 31 March (Zirtawpni) zing dár 6:22-ah Biak In bul aţangin kan chhuak a. Lawngtlaiah riakin a tûk zing dár 6:00-ah kan thleng a ni. Aizawl aţanga Devasora South hlat zawng hi Km. 480 vêl a ni.

Kan thlen tûk ni 2 April (Pathianni)-ah chuan Missionary In luah laiah ringtu tlém awmte nèn chawhnu leh zànah kan inkhâwm a. A tûk zing dár 5:00-ah kan hna chu kan thawk ţan a. Khaw ţhenawm - Parva, New Chhippui leh Siminesora aţangin kan Missionary-te mi 8 laiin min rawn pui a, kan làwm hle. Ni dangah pawh Devasora South khuaa ringtu thenkhatin min rawn pui ţhin bawk a. Ni 6 April (Ningani)-ah kan hna kan zo. Bialtu Pastor-in Bial ţhuthmun Damdep II aţangin an Tual Upa pakhat nèn ke ngatin min rawn tlawh bawk a ni. Kan Quarters sak hi Assam type, a bang *tile*, a chung rangva leh a chhuat *cement* a ni a. Varanda a nei a, varanda sirah hian Toilet/Bathroom (9x4 ft) a awm a, tui dehna leh tapchhak inkawp (6x3 ft) nam pûk a ni bawk. Ni 7 April (Zirtawpni) zing dár 7:10-ah Devasora South chu chhuahsanin, ni 8 April (Inrinni) tlai dár 3:30-ah Aizawl kan rawn thleng a ni.

**10. Report ţul dang** : Devasora South hi Chakma hlang awmna khua niin In 119 a awm a, chumi zinga in 2 chauh chu Kristian ina chhal theih a ni a. Mihring 560 vêl awmin, an zingah hian Kristian 12 chauh an awm a ni. Eng kohhran mah a la din loh avàngin ram lâk tûr a tam hle. Sawrkar sikul an kai mumal lo va, anmahni pawhin an beisei ang taka Mission School dinsak a châkawm hle a ni.

*Zochhuanpuia Rokhum, Ramthar Ziaktu (Asst.)*



**6.**

- 1. Field Hming** : Cachar Mission Field
- 2. Khua** : Dholchhora
- 3. Tlawh hun chhúng:** Ni 10-17 April. 2017
- 4. Tlawhtu** : I.T.I. Véng Kohhran
- 5. Kal zât** : Mipa – 20; Hmeichhia - 1
- 6. Tlawh chhan** : Hnathawh leh Good Friday hmanpui
- 7. Hnathawh** : Kohhran Hall chung chih leh Biak  
In Electric wiring that
- 8. Senso zât** : ₹ 92,000/-
- 9. Lâwmawm lam** : Ni 10 (Thawhtanni) zing dár 6:30-ah Upa R. Manlianah tawngtâin min thlah a, Bairabi kawng lamah kalin, tuang takin tlai dár 3:00-ah Dholchhora kan thleng. Thawktute leh Kohhran Upaten min lo dawngsawng a, kan hlim hle. Kan thlen tlai hian Kohhranhote zanriah min lo buatsaihsak chu kan kil ho nghal a, kan tlai hle. Kan chàm chhúng zawngin harsatna eng mah tâwk lova Pathian hruaina leh enkawlna avâng leh Kohhranhote tawngtâina avângin kan tih tùr tha taka kan thawh theih avângin kan lâwm hle a ni.

Ni 12.4.2017 (Nilai) zàn aţangin Good Friday leh Easter Sunday zàn thlengin Work Camp—a kalte Kohhran inkhâwmah hun min chantír a, tisa leh thlarauah hlâwk takin hun kan hmang. Ni 17.4.2017 zing dár 6:00-ah Kohhranhote nèn Pathian malsâwmna inhlan chung leh inthlahlel tak chungin kan in mangtha a, chhun dár 12:00-ah tuang takin I.T.I. Véng kan thleng a ni.

**10. Report tûl dang** : Dholchhora hi Silchar Mizo Bial chhúnga awm a ni a. Kohhran In 32, kohhran mi zawng zawng 185, dân zawkim 114 an awm. Cinnamon English Medium School (*Nursery- Class VIII*) an nei a, kumin hian zirlai 200 an awm. Tûnah hian Missionary 4 (*SMB aţangin 2, Native Worker 1 leh Kohhran mal châwm 1*), Kohhran Upa 3 leh Tual Upa 4 ten an enkawl mék. Lalpan kan hnathawh malsâwm zêl rawh se.

*C. Lalchhuanmawia, Ramthar ziaktu.*

**7.**

- 1. Field hming** : Tripura Mission Field  
**2. Khua** : Tuidu  
**3. Tlawh hun chhúng**: Ni 11-14 April, 2017  
**4. Tlawh tu** : Zamuang Kohhran  
**5. Kal Zât** : Mipa – 11; Hmeichhia - 6  
**6. Tlawh chhan** : Hnathawh  
**7. Hnathawh** : Thawktute Chapel saksak  
**8. Senso zât** : ₹ 30,000/-  
**9. Làwmawm lam** : Ni 11.04.2017 zing-ah Zamuang ațangin Tuidu Tripura panin kan kal a, tluang takin Tuidu chu tlai dâr 6:20-ah kan thleng a. Thawktuten hlim takin min lo dawngsawng a, kan lâwm hle. Kan thlen tûk ațangin ni tin, zing dâr 5:00 ațanga tlai dâr 6:00 thleng ni thum chhúng țahnemngai taka thawkin, kan hnathawh tûr ang te kan zo thei a ni. Kan Missionary te pawhin a țul ang apiang min lo thawhpui ve bawrh bawrh bawk a, kan inpawhna a țhain nuam kan ti a.

Tuidu Kohhranah hian kan Kohhran mi, NI. Sangchhingpuii chu Evan Teacher in a awm ve mék a, kan thlamuan phah hle mai. Tuidu Kohhrana thawktuten anmahni puala Chapel neih an mamawh avàngin Pi Hrangaii (L) Zamuang Kohhran, a țhat lai hun chhúng zawng Missionary-a lo thawk tawh hriat reng nân a faten Chapel sakna tûr sum leh pai thawh khâwmin hma an la a. Hemi hmunah hian Zamuang Kohhran Ramthar Committee bul tumin a sak hna kan zuk thawk a ni. Chapel sak hna hi a hmuna thawktuten eng emaw chen an lo thawk tawh nghe nghe a ni. Pathian hruainain dam takin Zamuang chu tlai dâr 4:00 ah kan thleng leh ta a ni.

**10. Report țul dang** : Tuidu-ah hian sikul changtlung tak kan Synod-in a nei a, naupang pawh 900 vêl zet an nei nghe nghe. Thawktute inpêkna leh thawhhona a țha hle a, thlarau lam boruak pawh a nuam hle. Tuidu Pastor Bial chhúng Kohhran hmun hrang hrangah min sem darh a, kan zing ațangin mi eng emaw zâtin Kohhran hrang hrangah thu kan sawi a, a nuamin hlâwk kan inti hle.

*Lalrinmawia, Ramthar Ziaktu*

## SMB RINGTHAR 2017

Sl. No	Field	June thleng	July	July thleng
1	Arunachal East	117		117
2	Arunachal North	187		187
3	Arunachal West	95	20	115
4	Assam	28	6	34
5	Barak	92	35	127
6	Delhi	36	20	56
7	Jharkhand	330	43	373
8	Karbi Anglong	113		113
9	Home Mission North	30		30
10	Home Mission South	160		160
11	Kolkata	363	95	458
12	Lucknow	156	74	230
13	Nepal	89	12	101
14	Odisha			0
15	Patna	88	18	106
16	Siliguri	60	31	91
17	Tripura	1112	107	1219
18	Masihi Sangati	913		913
<b>TOTAL</b>		<b>3969</b>	<b>461</b>	<b>4430</b>

Thu ringawtin a daih loh chin a awm thin.

A sawia sawi te, a nuna nunpui te leh a thawha thawhpui te a fûl thin.

Barak Area-a kan missionary-in a ram mi lei a lehpui.



## SHORT COURSE MISSIONARY TRAINEES

15th Batch (July 3 - October, 2017)



**Sitting (L-R) :** B. Lalnupuli, Vanlalehhanhimi, Zoremiam, Lallawmawmi kawini, HD Lalnunpuli,

Rebecca Lalrinzuali, JC Lianmawi, C Lallawmsangi

**Standing (L-R) :** Rozirhana Hauhar, Albert Sathranga Valphei, Zoliana Chakma, Laltiankima Chhangte,  
Ramdinpuia Rentblei, HD Vanlaluata, Krista Roluapula Sallo, Maya Ranjan

If not delivered please return to:

The Manager

Ramthar Chanchinbu

Synod Office, Aizawl, Mizoram,

India. Pin - 796001

Postal Regn. No MZR/46/2015-2017

RNI Regn. No. 40889/88

To

Published by Rev. K. Lalrimawia and Printed at the Synod Press, Aizawl on  
behalf of Ramthar Association, Aizawl, Mizoram. Copies- 32,900